

**UDAL BATZARRA 8/03**

**UDAL-BATZARRAK 2.003KO MAIATZAREN 9AN EGINDAKO  
EZOHIZKO BILKURARI DAGOKION AKTA**

**LEHENDAKARIA:** Jose M<sup>a</sup> Sarasola Goenaga

**ZINEGOTZIAK:**

Pedro M<sup>a</sup> Peñagarikano Labaka  
Miren Maite Aizpurua Etxeberria  
Manuel Odriozola Iruretagoiena  
Mikel Errazkin Agirrezabala  
Rafael Uribarrena

**IDAZKARIA:**

Oskar Azkona Garcia

**AZTERGAIAK:**

**1.-**Sustapen pribatuko babes ofizialeko 58 etxebizitza eta salmenta libreko 24 garaje eraikitzeko, Anoetako Arau subsidiarioetako Iturtxulo izeneko 19. eremuan Anoetako Udalaren jabetzako orube bat lehiaketa bidez besterentzea zuzendu behar duten baldintza ekonomiko eta administratiboak.

**2.-**Udalbiltza inguruko mozioa.

Anoetako Udaletxean, bi mila eta hiruko maiatzaren bederatzian, arratsaldeko seietan, Udal-Batzarra bildu da, Ezohizko Bilkura egin asmoz JOSE MARIA SARASOLA GOENAGA Alkate jaunaren lehendakaritzapean, alboan aipaturiko zinegotziak dituela.

Oskar Azkona Garciak, Udal honetan Bitarteko Idazkari bezala jardunean ari denak, denaren berri zinpean jasotzen du.

## **ESAN-EGINAK ETA ERABAKIAK**

**1.- Sustapen pribatuko babes ofizialeko 58 etxebizitza eta salmenta libreko 24 garaje eraikitzeko, Anoetako Arau subsidiarioetako Iturtxulo izeneko 19. eremuan Anoetako Udalaren jabetzako orube bat lehiaketa bidez besterentzea zuzendu behar duten baldintza ekonomiko eta administratiboak.**

Udalbatzarrerara bertaratutakoek ahobatez egitasmoa eta pliegoa onartu dituzte, eta ahalmena eman diote Alkateari beharrezkoak egin ditzan gai hau aurrera ateratzeko.

## **2.- Udalbiltza inguruko mozioa.**

Mozioan jasotzen diren hiru puntuak ahobatez onartu dira. Sarrerari dagokionez, Batasunak mozioan jasotakoari eusten dion bitartean, EAJ/PNV-k beste bat aurkeztu du.

Honako hau da mozioan jasotako sarrera, Batasunak babesten duena.

*Udalbiltzaren adierazpena eta bozkatzeko mozioa:*

*Iluntasunean babesturik, Espainiako “justiziak” Udalbiltza desegiteko lanari ekin dio. Epaille arrotz baten aginduz eta atzerriko polizi indarren bitartez, hainbat euskal hautetsi eta Udalbiltzako langile zenbait atxilotu dituzte. Horrezaz gain, Bizkaia, Araba, Nafarroa Garaia eta Gipuzkoako egoitzak dokumentazioz hustu eta egoitzak itxi dituzte.*

*Udalbiltzak udalak eta udal hautetsiak biltzen ditu. Gaur gaurkoz Udalbiltza da Euskal Herri osoa biltzen duen izaera nazionaleko instituzio bakarra. Gure*

*herriaren izaera ukatu duten indarren betidaniko helburua izan da Herri honek instituzio nazionalik ez izatea.*

*1999an Udal Hautetsiek Udalbiltzaren sorrerarekin Euskal Herri osoa bere baitan biltzen zuen instituzioa sortzeko pausu historikoa eman zuten. Pausu horri esker urte hauetan nazio mailako instituzionalizazio prozesu bat abian jarri dugu.*

*Horren babesean Udalbiltzak (eta baita eragile sozial, sindikal eta politikoek ere) mahai gainean gure herriak bizi duen gatazkari konponbidea bilatzeko funtsezko proposamenak jarri ditu mahai gainean. Aipa ditzagun horien artean batez ere: Euskal Herriaren Eskubideen Karta (Herri honen eta bere herritarren eskubideak aitortzen dituen); Euskal Herria bakea eta demokraziaren bidean jartzeko proposamena (Gatazkaren konponbiderako oinarriak proposatzen dituenak) edo nazio eztabaida gunea (Herri honek bere geroa erabakitzeko bazterketarik gabeko eztabaida-gunea).*

*Urrats horiek edo antzeko beste batzuk ezinbestekoak dira Herri honek behar duen behin betiko konponbidera iristeko. Estatu espainola ematen ari den urratsekin argi adierazi zaio herri honi ez duela ezer aldatzeko borondaterik. Gerra eta sufrimenduaren bidez herri hau desegiteko erabaki zaharra gauzatzeko ahaleginean ari da. Estatu espainola Euskal Herriak bere burua subjektu politiko gisa egituratzeko ahalegin guztiak zapuzten ihardun da. Udalbiltza sortu zenetik lau urte joan dira eta urte hauetan eraso horiek etengabeak izan dira.*

*Urrats hau, azken hilabeteotan Estatu espainolak eman dituen beste batzuekin kateaturik dator. Euskal Herriaren nazio izaera ukatzearekin batera, euskal herritarrek bere ordezkari demokratikoki hautatzeko duten eskubidea indarrrik gabe utzi nahi da, eta horrekin batera biltzeko eskubidea, bizitza publikoan parte hartzekoa, bozkatzekoa, adierazpen askatasuna...*

*Eraso honek, beraz, Euskal Herriak bere buruari eman dion, eta herri baten bizitzarako ezinbestekoa den instituzionalizazioa desegitea du helburu Euskal Herriaren Beraren izaera ukatzen eta desegiteko ahaleginetan ari dira.*

Honako hau da EAJ/PNV-k aurkeztutako sarrera:

*Apirilaren 29an ezker abertzalearen Udal Hautetsien Batzordearen aurka operazio poliziala burutu da. Berriro ere, beste eraso baten aurrean aurkitzen gara, estrategi*

*jakin baten parte den eraso. Bide horretatik, Euskal Herrian geroz eta enfrentamendu handiagoa sortzen duena eta sortuko duena, desestabilizazioa eta tentsioa areagotuz.*

*Operazio juridiko-politiko hau zuzen zuzenean ideologia askatasunaren kontra dijoa, proiektu politikoak defendatu eta zabaltzeko hesiak ipiniaz eta aniztasun politikoa ukatuaz.*

*Horretaz gain, erabat onartezina da Udalbiltza ETaren aginduz sortua izan den Erakundea dela leporatu nahi izana. Azkenaldi honetan gertatzen ari denari jarraituaz, aberri eraikuntza, euskara, eta orohar euskaldun izatearekin zerikusia duen oro delitu bihurtzeko dinamika maltzur baten aurrean aurkitzen gara.*

Hemendik aurrera hiru puntu jasotzen dira, ahobatez onartu direnak:

*Hori guztia kontutan hartuta, Udal Batzar honi honako puntuok proposatzen dizkiogu:*

*1.-Udal Batzar honek berretsi ditzala Udalbiltzaren sorreran Udal Hautetsiek bere egindako bost ardatzak (1.999ko otsailaren 6an Iruñean onartuta):*

*1.- Euskal Herria nazio bat dela aldarrikatzea.*

*2.-Euskal Herriaren egitura politikoa eraikitzeari laguntza ematea, lurraldetasunaren lekuko izanik eta zazpi euskal lurraldeetako udal ordezkariak esparru erkidean hartzeko asmoz. Euskal Herriaren nazio eraikuntza bultzatzea, prozesu dinamiko eta demokratiko gisa ulerturik eta Euskal Herritar guztien erabakimen eta partehartze askean oinarriturik.*

*3.-Instituzio iraunkorra izateko asmoarekin jai da; borondatea pilatu eta batzeko sortua da. Izan ere instituzioa nazio esparruko denez, Euskal Herriko antolakuntza instituzional zein politikoa egituratzen sortu beharreko azterketa eta eztabaidak bultzatuko ditu dinamika politikoarekin bat eginez.*

*Egituratze honen zehaztasunak prozesu demokratiko baten menpean adostu beharko dira, non euskaldunen partehartzea funtsezkoa litzateke eta herrialde historiko guztien eraientza errespetatuko liriateke.*

*4.-Herrialde guztietako udalerrien arteko harremanak eraikitzen laguntzea. Instituzioa zabalik dago Euskal Herriko erkidego naturalean bere iharduera garatzen duen hautetsi guztientzat politika, kultur soziologi eta ekonomi erkidego gisa definitzen gaituzten lan eta lankidetzak esparru guztien inguruko ekintza bateratua ahalbideratuz. Esparruok ondokoak dira, besteak beste:*

*hizkuntza, kultura, kirola, ingurugiroa, lurraldearen antolaketa, ekonomi garapena, ongizatea...*

*Lehendabiziz, Euskal Herriari buruzko diagnostiko oinarritzkoa egingo litzateke: geroago, nazio eraikuntzaren arazo eta erronka erkideei modu bateratu eta homogeenan egingo litzaieke aurre, eta proposamen zehatzak beste esparru instituzional batzuei, gizarte mugimenduei, erakundeei,...bideratuko litzaieke.*

*5.-Nazioartean, Euskal Herria nazio berezkoa eta desberdindua dela adieraztea, baita Euskal Herriak nazio gisa ihardun nahi duela Europako geroko egituraketan eta instituzioetan ere.*

*2.-Euskal Herriaren aitortza ekarriko duen dinamika nazionalen aldeko apustua egin dezala (Maila instituzional, ekonomiko, sozial edo kulturean), horrek soilik ekarriko baitu gure herriak bere geroa ziurtatzeko behar duen aitortza, eta gatazkaren konponbide demokratikoa.*

*3.-Herritarrak dei ditzala maiatzaren 9an 8etan Udaletxe aurrean ordu laurdenez egingo den bilkuran parte hartzera*

*Anoetan, 2003ko maiatzaren 9an.*

Udalbiltzaren Batzorde Eragilea

Eta beste aztergairik ezean, alkate jaunak amaitutzat eman du bilkura, arratsaldeko zazpiak bost gutxiago direnean. Guzti honetaz, nik Idazkariak, fede ematen dudalarik.

O.E

ALKATEA

IDAZKARIA